



Tasiilami innuttaasut suliffeqanngitsut paaqqinninnermi isumassuinermillu immikkoortortaqarfimmi sulilersinnaanissaannut qaffasaanissamut immikkut suliaqartussanik pilersitsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Immikkut suliaqarnissaq sukkanerpaamik aallarnisarneqassaaq nunarpullu tamakkerlugu atuutilersinneqarnissaa siunertaralugu ataavartumik nalilersorneqartassalluni.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Demokraatit Inatsisartunut ilaasortaataannut Anna Wangenheim-imut siunnersuummut uunga pitsaasumut.

Tasiilami inerisaanissamut annertunerusumik ukkatarinninnissaq pisariaqarpoq. Tasiilap Tunumi inerisaanermi qitiusinnaanera piukkunnaateqarpoq, taamaattoqassappalli piumasaqaataavoq, nuna tamakkerlugu politikikkut Tasiilami ajornartorsiutinut isummersornissarput.

Pisariaqarpoq, nuna tamakkerlugu politikkeriusugut ineriartortitsinissamut pitsaasunik sinaakkusiinissarput. Taamaattumik Demokraatit ukiorpassuarni sorsuutigisimavaa, Tasiilami mittarfiliortoqarnissaa. Kisiannili aamma pingaartuuvoq, inuit ataasiakkaat eqqarsaatiginissaat. Uani pingaaruteqarpoq suliffeqarnissaq suleqataanissarlu. Nunatsinni sumi tamaani - aammalu tassa Tasiilami – paaqqinninnermi isumassuinermillu sulisussanik amigaaqarpuq. Taamaattumik iluaqutaassagaluarpoq, piginnaanngorsaqqiinernik pilersitsigalarutta, qulakkeerinnittussanik, innuttaasut suliffeqanngitsut paaqqinninnermi isumassuinermillu piginnaasaqalerlutik sulisinnaasussanik.

Piukkunnaateqarpoq, Tasiilami misiliutitut pilersaarutip aallartinneqarnissaa, soorlu Anna Wangenheim-imit siunnersuutigineqartoq kingusinnerusukkullu naliliisoqareernerata kingorna nunatsinni piffinni allani ingerlassinnaanngorlugu. Demokraatinut pingaartuuvoq, allatut eqqarsarnissarput, ilitsoqqussaralugillu iliuuserisartakkatsinnit allaanerusunik iliuuseqarnissamut sapiissuseqarnissaq. Una siunnersuut tassunga assersuutissatsialaavoq. Tasiilami ineriartornermik pilersitsinnaavoq taamatullu immikkoortortami, pisariaqartitsigaluttuinnartumi sulisussanik qulakkeerinnissinnaalluni

Aappaagumut aningaasanut inatsisissatut siunnersuutip saqqummiunnerani siunniunneqarpoq, 1 million koruunit ilinniartitaanermut atorneqassasut Tasiilami. Iluassaqaqanangaasa taakku pilersaarummut atorneqarata.

Demokraatit maluginiarpaat, Naalakkersuisut allannguutissatut siunnersuummik saqqummiussisimasut. Allannguutissatulli siunnersuut ajoraluartumik tigussaasuunngilaq, allaffissornikkullu misileraanertut ippasiinnarluni. Atorfissaqartinngilarput. Iliuuseqarnissaq pisariaqartipparput soorlu Anna Wangenheim-ip siunnersuutaata siunertarigaa.



Taamatut oqaaseqaateqarluta Demokraatit Inatsisartunut ilaasortaatitaata Anna Wangenheim-ip siunnersuutaa akuerineqassasoq innersuussutigaarput Kulturimut, Ilinniartitaanermut, Ilisimatusarnermut Ilageeqarnermullu ataatsimiititaliami suliareqqitassatut innersuussutigalugu.